




3301



獄 監

於成凡其靡朝靡夕不辭鞅掌者皆所以爲民也嘗謂承憲命膺民社而不能庇民者得無有媿於中乎四民間之踴躍奮激及其辭去空巷走送不欲其行王瑞芝字輯五山西太原籍奉天法政專門學校畢業民國八年夏到任性明敏勤聽斷求民之瘼知境內民居星散匪警難備乃毅然行歸并屯堡之策派員試辦成效卓著又以縣境利源盡在東南而交通梗塞不易振興乃籌款萬元開通濛江孔道規畫遠大商民實利賴之仁惠旣施輿情日洽農工商賈踴躍其業又思有以宣其和慰其勞特於縣署東北隙地闢爲公園池塘亭榭花木禽魚深邃幽曲與民同樂公又好學聽政之餘手不釋卷輝南風土志公所著也

費光國字英庭直隸灤陽孝廉也民國十一年由鳳城調任來輝下車伊始詢

民疾苦凡勞民之政悉予緩辦不避愆謫卒以此忤上意解職去雖在任未久而民情愛戴有細侯再來之盼云

王杼字寄青遼陽人也民國十一年蒞任明斷有爲勞怨不避地方宿弊次第廓清時值巨匪任意均侵境聲勢浩大人心洶懼朝夕不保公以積存罰款呈請留用編制礮隊隨方備禦縣城賴以保全威力所震四郊亦無巨創公之惠也輝南設治未久文廟闕然公以聖道關繫世道人心者至深且鉅堂陞不修將青衿佻達見於城隅莘莘士子何所景仰遂多方募款鳩工力作未及歲事解去其行止果決有如是者

白純義字仲方興京縣人北京國立法政專門學校法律本科畢業奉天高等文官攷試及第民國十三年秋攝篆來邑器識洪深守爲兼優時值旱荒民食

既缺春耕難望籌畫貸欵心力交瘁赴省籲請卒將儲蓄會分會移來駐輝民
賴接濟四野騰歡田呼續命奉直兩役徵夫發車羽電紛馳急如星火乃能不
避威怒減少徵數惠逮細民十四年田畝檢舉案省令森嚴竟寢不肯發以爲
窮黎負郭之田山水各半災異頻仍賦徭應供之外其餘幾何而檢舉未行保
惠實多所謂他郡自有青州獨無堪媿美焉股匪任意均竄擾縣境實懷巨測
乃指揮勦防深夜獨出稽詰守備匪不得逞翌年受撫民頗被擾毅然與收降
委員樽俎折衝嚴立條件卒賴庇護又後先修建文廟籌欵立師範學校倡修
縣志及創圖書館重文化惠工商卹窮民制小醜瑩瑩大端俱可數也

鄉宦

楊雲輝字子林花翎同知銜光緒初年總辦吉林東邊荒務旋任延吉廳同知

轉升長春府知府未及接篆以丁艱故携眷返籍後遂高隱林下當其治延吉時處煩劇之區理荒陲之政措置咸宜頗負政聲云

楊顯青字蔚藍青侑生光復後留學東瀛肄習政治歸國充東豐縣教育所長被選爲省議會議員任滿被擢爲莊河縣稅捐局局長嗣被選爲參議院議員賈安亞字卓霖直隸優級師範學校畢業蒿目時艱投筆從戎由黑龍江省督軍署副官轉任吉林陸軍營長旋升團長

朱文達樓街人由軍功保候選知縣

姜毓靈樓街人例捐候選縣丞

白世際團林子人例捐候選府經歷

李華春字芳園吉林法政學校畢業後充律師應奉天法官考試及第銓授興

京縣公督承審員

任述言字振聲前清五品軍功保獎警佐歷充捕盜營哨官及警察所長所向奮勇盜寇披靡市城治安實資鎮懾者垂二十載民國十一年冬任意均匪首徐鴻泰率黨羽破烏拉陷伊通入山城孤山等鎮疾風掃葉所過一空縣城戒嚴達旦不寐會歲暮稍靜陸軍駐城衆一營與地方兵隊齟齬乃調警察游擊隊駐大場園述言時任警察所長赴點閱未既事探報馳至任匪千七八百人長驅而下述言率警兵七十人迎擊出其不意前部辟易退數里俄而大隊擁至圍官兵於曠野雪地中飛彈雨集述言奮臂酣戰汗涔涔下日向暮圍益急士卒弱者至欲擁述言去述言曰汝儕不見吾人被圍於某酒商院中者二十餘名吾去彼無子遺矣南岡吾去路速據之母爲匪奪可生還也匪奪岡數次

悉被述言遙擊紛墜是時官兵救死扶傷左右儘四五人知勢不敵乃隱伏雪中回身迎擊逆退突圍漸退漸行破酒商院拔被圍兵出循岡而還時已黃昏矣是仗自午至夕歷六小時兵亡六名傷九名悉扶負以歸匪之本意欲掠縣城死傷三十餘人射用銃彈四萬餘粒受此巨創知述言不易與改逕南去獨述言於士卒紛踏之際挺身力戰卒遏凶鋒非健者孰能之

白玉田字閣臣前充東北陸軍二十五旅步兵第八團團部軍需長現充東北陸軍司令部上校諮議

白雲龍字鳳五前充東北陸軍二十五旅第八團團部上尉副官現充鎮威上將軍公署軍需處少校辦事員

白雲祥字瑞五前充奉天兵站處少校委員及駐關內東北陸軍檢查服裝上

校委員奉天陸軍被服廠第二科少校科員現充奉天東北陸軍被服廠上校
探辦主任兼充東北陸軍第八師司令部上校諮議京師軍警督察處諮議陸
軍三等軍需正五等文虎勳章王毓璋字潤璞現充京師衛戍總司令部中校
副官

趙廣善字子元前清漢軍引見驍騎校任海龍總管衙門兵司主稿民國改元
改充警察所總務股員

王英魁字紫垣前清五品頂戴歷任海城縣捕盜營外委及海龍廳外委

王玉祥字環璞初充警察區官既而升吉林陸軍團部附官轉任騎兵連長晉
陞營長

趙錫俊字惠卿前清漢軍驍騎校民國十三年充吉林陸軍獨立團團部軍需

長

高國藩字樹封奉天講武堂畢業充機關槍連長轉陸營長改任陸軍第二十七旅參謀長

慈善

撫濟賑卹官府之美惠搢紳之餘力於鰥寡孤獨及殘廢失業窮老無告者本社會互助人類同情之義而援助其生活於是有慈善事業之組織輝南設治未久民生狀態較易維持而四方來居者皆膂力方剛之輩耕鑿自給無虞匱乏間有少數廢老癯子之人而比隣餉饋亦免餓莩地不愛寶民生在勤社會民衆生活之能力綽有餘裕故除爲內地水旱兵燹募賑而外地方慈善事業尙無所組織也官憲所辦含有慈善性質者有教養工廠紳耆之急於公益而

負慈善之聲者則有龐紫巖云

龐紫巖邑西二區人慷慨好義力善不倦目擊貧家子弟無力就學乃於樓街設義塾一處師資雜費獨力擔負備凡來學者分文不索自清季迄民國初元地方學校創設之時歷十年之久教授學生數百人迄今人猶稱之

教養工廠 附

輝南教養工廠設縣署西院民國八年成立專事收容游民教以工藝以清鄉罰金作爲經費民國十二年奉令停辦當以地方游民未盡就業呈准續辦招集各區長議決改組由地畝抽小洋四千元爲開辦經費以行政罰金扣留五成補助囚糧勘解之欸酌撥膳費由警所暫爲兼理以衛生警察爲看守收容執行期滿之誘竊訛騙烟賭各輕罪犯管理內設廠長一人及司事看守工師

各一人習藝分設縫紉造鞋印刷編織洗濯等科

藝術

輝邑設治以來百工居肆以成其事形上爲道形下爲器肆而習之亦各有人醫卜星相皆爲餬口計求其擅一技之長以藝術鳴者蓋不可多得僅就醫業書法可稱者各一人爲述之

柴萬昌字東圃二區樓街人精通醫理遠近知名每遇沈疴着手立起挾其術遨遊東邊活人無算其醫病以認脉爲第一要訣認藥次之研論入微懸壺之士罕有出其右者

劉樹藩字績卿縣城人長於書法初學歐繼習柳而楷書似真卿筆力遒勁喜爲人作書城鎮各處市招匾額多出其手

藝文

摺奏

奏請設治輝南直隸廳於大肚川摺

徐世昌
唐少儀

竊惟奉省州縣自庚子以後增析已多然仍有邊郡廣袤夙爲逋藪蒙荒新墾亟望民官或海島孤懸未定地方管轄或商埠重要猶無行政之機關以及井地不均經界未正均應裒多益寡以垂久遠之經臣蒞東兩年悉心規畫謹將奉省增治改治並一切劃界事宜敬爲我皇上縷陳之一曰海龍府析設廳治海龍東南與吉省濠江毗連森林叢密從前本係鮮圍間有山田當光緒四年全行放墾乃庚子變亂民居焚掠殆盡嗣廳升爲府西北設西豐西安東平等縣獨東南一帶猶多伏奔逃戶畏阻不歸臣擬於距府一百里之大肚川設一

直隸廳以資招撫查海龍共三十六社析其東南八社而以窩集河一統河爲府廳之界該廳全境在輝發江之南擬名曰輝南直隸廳即遴員試辦此輝南廳設治之實在情形也

奏請將輝南廳治移設謝家店摺

錫良
程德全

奏爲移設廳治並修建衙署各情形恭摺仰祈聖鑒事竊奉省海龍府屬新設輝南廳治業經前督撫臣將辦理各節並在大肚川設治情形彙案具報在案茲據民政使張元奇呈稱原定該廳設治大肚川地方局勢逼仄不敷展布山路崎嶇交通不便迭據該府及設治委員往還履勘擬改於距府東南九十里之謝家店設治該處爲輝境適中之地四面山環水抱其中平坦西南爲赴柳河大路東北爲赴磐石衝衢正東係濛江要途西北通海龍府治四通八達人

民易於招集商賈便於往來洵屬全境最優地點等情並由該府廳稟請撥欸
建署以資鎮懾等情前來臣等再三審核所稟確係實情請即准將輝南廳治
移設謝家店以規久遠至請欸建署一節查奉省奏定章程凡建築州縣衙署
准給銀五千五百兩監獄給銀一千五百兩現在輝南廳係屬新設自應按照
辦理統計衙署監獄兩項工程共需銀七千兩當經飭由度支司查照撥發作
正開銷並飭設治員趕速估修核實動用不得稍有浮冒以符定額而循向章
除分別咨部查照外所有輝南移設廳治並撥欸建築衙署監獄緣由理合恭
摺具陳伏乞皇上聖鑒訓示謹奏

奏請試辦輝南直隸廳設治委員薛德履改爲署

理同知片奏

再查奉省前因蒙荒增闢邊境空虛經調督臣徐世昌暨臣察度情形先後奏請添設輝南直隸廳同知並聲明先行派員試辦如能勝任再請補署情形仰蒙允准在案茲查試辦輝南直隸廳同知設治委員奏調山西補用直隸州知州薛德履在該設治處所凡應行籌備事項經營締造成績昭彰委辦已滿一年自應改爲署理據民政使張元奇呈請具奏前來臣查該員薛德履明敏篤實勤奮有爲堪以改爲署理仍由臣隨時考察如果稱職再行奏請補授相應請旨飭部立案以重地方而專官守除咨部外理合附片具陳伏乞聖鑒謹奏

序記

輝南公園序

里飛萬鵬翼海城

天地一大公園也盡世界人之挹覽而未有以爲小者公園一小天地也假朝

夕之優游而實足以資其大者以大寓小可取萬物而納諸方寸以小喻大可達上下而通乎古今明小大之理而極其用者惟至人乃能之余以清鄉來輝訪政俗於井里無毫壯婦稚僉曰吾邑宰王公賢父母也吾因得聞其美焉輝南境僻風純而待舉之事多王公既臨斯土乃手闢草萊躬播政教勞而彌勤如建孔廟以崇德教祀關岳以勸忠義興學校以育人材集屯堡以防匪患他如設農會獎林業廣商場厲警甲開社講演無一非樹本培風公於聽訟之暇尤能諮請野老以溫語求民疾苦蓋公以民有隱甚己之隱民有憂甚己之憂必欲得其隱而釋其憂然後公乃快公愛民既深牧民斯勤因念吾勞矣吾之農亦必勞於田吾之工商亦必勞於市當思有以弛佚寬濟使默滋潛化於不覺也於是公展署北隙地理其荒穢敷爲公園地雖方畝而亭池花木備焉足

供輝民游眺輝之民見公游樂輝民亦樂然公豈先民而樂者特先此樂以樂其民耳吾游來輝既聞公政復游公園得公之美如此雖然此猶公之小試非公大猷假使公得行其道其惠施未可以輝之百里計更未可以此方畝之園計也

設立屯堡記

王瑞之

古者五家爲比五比爲閭進而至於族黨州鄉類皆出入相友守望相助家有比鄰之樂野無犬吠之警此風清俗美物阜民安後人所以稱爲盛世也我輝南地僅八社山深林密戶口零落其初原係海龍之一隅洎宣統二年開爲縣治人口始稍稍盛然居其地者率皆客籍每因田爲廬希圖自便久之成爲風俗此行彼效無地不然環顧四境訖無三五成鄰者秋深木落猶可稍安一旦

青紗幪起富者畏其綁掠逃居城鎮棄田廬而不顧貧者無力遷移只得坐受其蹂躪若不設法以安之哀我小民其何以堪瑞之於民國八年秋來守斯土憫人民之顛覆憤寇盜之縱橫乃毅然稟商各大憲首倡清鄉治本之計俾人民彷彿內地均聚旋而居化散爲整寇來則集衆以禦之賊去則合力以守之此雖不足言弭盜然可以嚴巡查可以便連坐且比隣而處動作皆知並可絕其窩匪通匪之患較之星散棋布無援無助者其利害得失不待智者而知也於去歲七月間已招集各區長甲長令其各擇適中地點劃分號數任各戶自行報領然非常之舉黎民懼焉創始之事黎民難焉乃復特派專員以專責成並隨時宣演其有無屯堡之利害俾一般人民確知其有益於己非官府好爲更張而故爲此擾民之舉也戶數不必其太多以該處戶口之多寡爲準距離

不嫌其過密以四週田地之遠近爲衡今甫及期年綜計全境前後已設立屯基三百四十五處歸併民戶四千三百九十九戶放領屯基一萬一千三百二十二畝五分然此其已然之事也其餘陸續添置者尙不知凡幾雖各屯房間尙未能一律蓋齊然但觀其呈報之初類皆爭先恐後其從民之所欲可知民心之厭亂又可知但無人爲之籌防禦策治安故其害猶至今而不絕今屯已成矣功已竣矣吾知欲保全治安者見瑞之此舉必喜其不便於私圖者聞瑞之此舉必怨喜者必將譽我怨我者必將毀我然瑞之爲多數籌安全而不爲一人計利害故譽我者不以其譽而喜即毀我者亦不以其毀而沮計惟有任勞任怨繼續進行必達其目的而後已至爲功爲過則聽諸他人而瑞之則未敢自較云

輝南公園記

王瑞之


輝南本前清鮮圍塲光緒四年乃闢荆斬棘度地居民宣統二年始設治於謝家店境東南峯巒叢雜林壑深邃西北輝發江環繞如帶縣城基址橫廣數千畝軒露開爽左龍首右鳳頂排闥並峙盤紆合沓頗據形勢余於己未夏來守斯土攬山川之靈秀物產之富饒人民之醇樸有蒸蒸日上之勢爰刻意經營力謀生阜甫週歲田野大闢貨財日聚商賈藏於市行旅出於塗穰往熙來民用康樂因思芸芸有衆終歲勞苦宜有以佚之縣署東北隅有隙地荒廢久雜樹生焉勢稍徧轉而見深可資遊覽乃於本年春撥工修繕相其勢植嘉木就小渚爲曲池中栽菡蓮上圍蒲柳畚土爲埠樹石狀山高逾仞上建茅亭登眺則林莽川阿蔚然列目浮水爲榭通以野約因勢而利用云彌月工畢皆罪犯

力未役一民用錢七百餘元爲余之俸餘及士民之資助其銜名坊以表之事竣庶民來游者踵相接入門勿禁物我俱忘蓋取古人治園囿之義與邑人同其樂也雖此園之闢置不過粗立基緒今後輝邑日興月盛則此方里之囿民以爲小也必然開拓而踵修之是則有待於後之君子

輝南公園記

李猶龍秋舫

粵攷金谷芳園名傳石崇華林勝境著自昭文雖其間樓台森列花竹繡紛亦足誇耀於一時然只供一人之豫樂而公衆不得涉其地洎時過境遷而湮沒隨之此私也而非公也我輝南設治伊始市井蕭條凡百建築多未暇及自監督王公輯五榮任於斯闔闔始日見興盛顧而樂之乃會商各界於署後隙地闢公園一所疊石爲山引流成池建亭榭植花卉以備遊人之飲讌以資士女



公 園

之流覽規模雖不甚宏敞然奇葩玉蕊翠鳥金魚凡可以借點綴園林之景色者搜羅殆無不盡公於聽政之暇携二三僚友來遊於此因得與城鄉父老詢民間之疾苦話閭里之桑麻藉以資考鏡證得失上下無猜熙往攘來是此園不第供人民之遊觀亦問俗觀風之一助也公之惠溥矣公之意深矣以此園爲鄭之鄉校也可以此園爲周之靈台也亦無不可其一應花費均募自捐助不事公歛計自春徂秋九閱月而功始成因見公之一動一作無在不與輝民之疴癢相關故次其巔末以誌園之所由成并見公之樂民之樂云

輝南公園記

姜炳元初平

輝邑爲佳氣所鍾左龍右鳳排闥送青天演一副好圖畫也惟是名地必借名人而傳蘭亭不遇右軍縱茂林修竹亦或埋沒於空山矣署之東北本一隙地

已未夏王公來守斯土既與斯民相見以誠因闢爲公園掘泉爲池架木爲亭築土爲山荒涼之場一變而爲名區蓋隱然一小蓬萊焉夫歐陽醉翁亭東坡超然臺古來循良吏何嘗不於公暇之餘寄情山水公與宿賢相輝映也以仁民之恩推及於愛物即一花一草亦含祥和而吐氣從先憂之意推及後樂即匹夫匹婦亦向塘坳而輸誠不必拘拘於一園而公之襟期已納萬物於在宥縮天地於方寸矣稽公之築斯園也由捐廉而成而公之遊斯園也或累旬不見不過推同樂之意以與民偕樂豈必壯魚鳥之極觀侈花石之奇珍哉然而民之愛公見夫柳暗花名莫不曰是我公之手植也見夫溪深魚肥莫不曰是我公之好生也彼夫靈囿靈沼何嘗不由民力而成而頌揚盛德至不歸功於閭閻而推美於我侯豈好諛哉蓋官民一體上下感召之氣有由然也至園林

之景色名人之述備矣姑不贅

遊輝南八景記

關慶元仁夫遼陽

歲在丙寅春秋之時携友二三遊夫輝南山水鄉人告余曰全境有八景焉且往觀乎余應之曰可斯時也天朗氣清仰觀俯察洵訝且樂於是出城數里左登龍首之山長白之脈石壁松陰交相掩映如笑如妝最足可人右陟鳳鳴之頂奇峯秀出東觀海日西望龍城夕照朝霞金碧輝煌映帶左右又行東南四五十里有青頂高峯爲全境諸山之冠層巒聳翠上出重霄積雪堅冰下臨無地玉山朗朗澗水溶溶林壑尤美蔚然而深秀也由青頂以還其山脈蜿蜒而來其勢則或起或伏突有虎迷山焉深藏虎穴仰見山靈雙出龍泉足覘水秀當隆冬而不冰莫能名其溫潤歷盛暑而不竭猶足徵其清涼汨汨源源不舍

晝夜飲之泐而甘銘爲醴泉誰曰不宜繼而東行百里之遙至老龍岡之巔龍潭在其上方六七里水深無際四圍則石壁流丹滿山則松林漾碧萬壑濤聲山鳴谷應別饒佳趣由是北折登扈爾奇山古輝發築城地也一頃平地三面臨江每現山市恍若蓬萊城垣樓閣縹緲雲中雉堞女牆徬徨眼底實輝發之大觀也又北行六七里有點將台焉山高數丈臺闊數武聖主駐蹕點將策勳迄今夜月登臨猶可想見其遺烈也未幾倦遊思返緩緩言歸渡輝發江登紫霞嶺則見絳亘數里狀若盤蛇倚伏千里勢同奔馬來往行人不減山陰道上朝夕煙景恰似天然圖畫覽邊城之美景羨輝邑之鍾靈不有記述則奇觀佳景蕪沒於空山矣筆之書以誌不忘云爾

論說

自由離婚論

李猶龍

婚姻之道一成不變者也蓋父母命之媒妁定之即極之困阨流離而其盟約決不可以或易世固有夫已故而守節以終者有夫甫沒而仗義以殉者更有標梅未及寡鵠生悲即誓同穴而不更字他人者或勸之則斷髮以誓人或迫之則截耳以自明志節凜若冰霜貞操堅乎金石此賢婦烈女所以流芳千古也乃今閱各城案卷自由結婚者亦時有其自由離婚者則指不勝屈而官府不察輒揚自由離婚之律判其兩離遂使一般婦女相沿相襲視爲固然此或嫌貧而愛富彼或厭故而喜新一訴再訴不違其目的而不止變恩愛爲仇讐視夫婦如奕棋蔓草零露之風愈趨而愈烈者皆自由二字階之厲也或云此法本自西人蓋以世之婦女往往不憚其夫但紅絲一繫莫可奈可亦惟有

斷腸鬱鬱以終已耳苟不稍假以自由其於尊崇女權之謂何不知西人道德之心重於情慾間有以性情不合而自由離婚者然以皆雙方同意未有如我國之一經反目即下機而去棄子女而不顧甘妾媵而不恥較之文君夜奔紅拂潛逃其情更有難堪者語云婦德無厭此法若行凡寡廉鮮恥者將一醮再醮而不可復制是家貧貌寢者永無白首之望矣與子之自由叛父臣之自由叛君何以異之三綱淪而五常斃有立法之責者其亦念及此焉否耶

碑文

白仲方監督德政碑

于龍辰
李碩夫 合撰

夫茹惠銘恩含生大性體仁戴德品物恒情是以霑風雨之滋者猶含和而吐氣資江河之潤者且沃若以生輝矧君子化行如風被草小人引領以口爲碑

當此地異南陽鞭笞莫辱國臨渤海繩亂堪虞則有袁宏雅化奚庸安石揚風
仲達清標何事任棠置水比之借寇恂於河內盜賊悉降以蔡彤守遼東風塵
不起敷政三年循聲四達如我邑侯白公仲方者英華外發清明內昭鯉庭承
訓暢家學之淵源燕市蜚聲冠膠庠之俊秀粵際強仕之年適當登庸之日橐
筆陪都捷文官之試下車輝發膺民社之司溯公於民國十三年秋來宰輝南
吾邑地處邊陲夙爲盜藪地瘠民貧風俗陋敝於時萑苻之衆方嘅如毛捐賦
所徵已憂無米而曩者所發公欸存條積欠鉅萬兌還無措益以荒旱爲災秋
收銳減公私交困商民俱艱無論省頒條教所列之諸新政之無力舉也即燃
眉之急亦非易濟者公以有猷有爲之資利興弊革樹治本治標之的雷厲風
行接篆彌月吉匪千餘來逼縣城大有僥然不可終日之勢公戎衣躍馬仗劍

登陴指揮佈防攻守兼施匪懼而迂道西出破入朝陽鎮公且馳騎往援以惠隣封自是吉匪受創相率遠避而地方小醜亦復跳梁公飭警甲厲行清鄉派員偵緝執獲鞠訊戮正懲從爬梳掃蕩宿垢一清正謀剔厥根株而東邊鎮守使委員來輝招撫矣匪酋徐鴻泰投誠伊始心存疑貳其衆利駐縣城以便挾制公密查其隱爰飭警甲堅防以備不虞指令其衆屯駐大肚川與專員及匪酋力爭聲色俱厲以野心未革之輩順逆靡常激或生變旁觀者方爲公憂而公聲氣愈壯卒奪其意使之伏從則輝城十數年蘊儲之精華不致爲降卒耗敗且保今日熙來攘往之盛者皆公一言之所賜也比其部曲移調也則小醜旣摧大盜已戢而風聲鶴唳之區一旦環堵安枕矣公遂別弊就實整頓雜捐收入漸豐彌補自易而公欸存條一時畢兌舉累年之積虧一掃而空且至是

以十有三萬之預算增至三十萬有奇今則又增一倍矣則杼柚其空之公歛一旦貫朽粟陳矣公歛既裕公遂銳意興學初輝境學校僅十有五至今添設三十餘校增級不可數計窮鄉僻壤普及絃歌且飾聖廟之門墻肅春秋之祀典修縣志以存文獻備圖書以餉士人此公之興教育啓文化也初輝邑試行區村制以人選問題呈請停止公以自治攸關輝民何讓力請續辦矜意措施而上下無壅閼之虞官民收佐治之效且村會供應嚴加限制鄉民擔負於以減輕而輝邑自治之運於以中興縉紳婦孺實稱頌之此公之復區村以臻自治也溯公蒞輝之秋承累年水旱之餘明春商民窮困幾不聊生公乃電商省垣儲蓄會貸款接濟未果躬往與議力竭聲嘶卒抵於成而農興於隴畝商懋於市廛至是金融鬆活田闢人集軌路密邇向所束手欲棄之石田今則寸畝

千金爭相購置而地方貧富之機因以幹轉惠詎一時海潤千里此公之貸歟
濟急而農困商艱永世俱蘇也若其積倉穀倡水田修道路試醫生勸薙髮禁
纏足限早婚斥離異而備荒交通並舉衛生風俗兼重矣至公之率屬也大法
小廉吏役不假事權僚幕尤重氣節公之聽訟也隱偽輸誠叛處皆當於律死
生各得其情夫皆盛德有以被之是以三載考績上曰賢能四民騰歡咸稱德
惠紳民等托少陵庇寒之厦食青州續命之田如潤江河實霽風雨歌叔度之
來暮誦國僑而難忘挹邑侯之蘭芬如瞻冬日抒野人之芹獻用勒貞珉

詩賦

輝發城懷古詩

清高宗乾隆

昔輝發貝勒拜音達里持兩端於我朝及葉赫之間屢背姻盟因山築城凡

三層以自固我太祖一舉而平之至今經其城仰神威之如昨勵慎守於無疆因爲詩曰天教草昧起英雄開創艱難自大東剗削蓬蒿基景運馳驅險阻立豐功渝盟徒恃營三窟不戰惟勞舉一戎荒堵秋風懷昔日欽承統緒凜予衷

登輝發故城再賦

輝發河東崑崙峯云是當年征戰處拜音達里擾王帥築城三遭守險固質臣取還婚弗娶潛與葉赫通盟屢患在肘腋弗剪除堂堂大業何由樹我師神武真天人一時龍虎風雲附師興五日破堅城殲魁誘脅爲臣庶即今旗籍那拉氏百年世祿被恩遇我來仰烈憶草創撫蹟應親攬艱劇威呼雙槳渡溪河彼岸候馬亂流渡葦藜蔽騎披冒過其下浸謠盡沮洳山從人面起巖岬仰不見

天密林樞策騎逕尋歷其巔雉堞久壞蔓草護故老無能爲我言敬觀締造披
實錄徒見山高水深慨懷哉久安長治故從臣謂我今日勞較昔如何莫輕語

行圍輝發詩

清聖祖康熙

鐵馬金戈百戰時戎衣辛苦首開基榻邊鼾睡聲先定始布中原一著棋

輝發城懷古

蓋形誥錫弓

石壁環江幾度秋寒鴉古木陣雲收兵連九國餘空壘烽靖三邊讓勝籌弓馬
聲威傳北極將臺形勢枕車流興亡如彼今何在山水依然空自留

庚申早秋賀輯五大令經始輝南公園落成之慶時在柳

河途次

里飛萬

別來時幾何泛迹如孤舟崎嶇經柳河獨爲仗劍遊北登青嶺頂南越黑石頭

叢莽夾迴溪奔崖挾湍暴客藏其間險惡不敢留鳥道奮躋攀酷暑汗難收
塵碌無停踪自笑何所求忽然得子書讀之意暢悠言闢小平泉不讓金谷幽
有山不在高鞏以助子修有水不在深清以鑑子猷更有亭翼然樂與民息休
元之君黃岡城上起竹樓右軍集蘭亭觴詠極勸酬前賢舉措微後世仰風流
雖卓於廊廟託志在壑邱當時偶經營傳頌及千秋輝縣非洛陽漸覺花事稠
定知評訟餘往聽里巷謳媿我方勞勞趨步若馬牛退少負郭田進虞多獲尤
德業日就荒徒與世沈浮何嘗遇名園與子相綢繆陶然共舉杯談笑以忘憂

輝發八景詩

關慶元

龍山夕照

長白支山腋蜿蜒勢若龍晴嵐連大野夕照掛高峯皎潔重巖雪濃青萬壑松

城門相掩映壁立似雲封

鳳頂朝霞

附城鳳頂好奇峯秀出西南佳氣濃旭日光華開世界朝霞燦爛豁心胸滿街樓閣輝金碧近水山林現玉容盛世來儀曾獻瑞人民三祝拜堯封

菰米雙流

縣邑西偏名勝傳龍潭虎穴說從前幾經疊疊蜿蜒路別有雙雙瀑布泉冬不凝兮暑不竭酒堪釀矣茶堪煎莫言邊地無仙境水秀山靈又一天

龍潭松韻

崗阜東南勝松陰接碧嵐傍臨伏虎穴上有老龍潭萬壑琴音聽重淵月色含山深林密裡隱隱住僧庵

青巖積雪

崇巒峭壁可摩天青頂高峯獨占先
林密干霄曾蔽日巖深積雪幾經年
玉山朗朗如鏡藍水深深靜在淵
遙憶東風能解凍四圍盤道盡飛泉

紫嶺行人

嶺長縣亘若常山車馬行人自往還
古道荒村縹緲際朝霞暮紫有無間
南連鳳嶺峯千仞東接蛟河水一灣
底是天然真美景憑欄遠眺畫圖殷

輝發山市

縹緲看山市雲中對影雙女眞
稱古國扈爾傍輝江城堞驚心幻樓臺過影厖
至今臨眺處春水響淙淙

將臺夜月

策勳懷駐蹕月夜上高臺山小平如砥墩高壯若堆輝江流貫注長白勢潑洄
美景誠堪繪遨遊斯樂哉

龍山夕照

劉順則卿譜

龍首山光迥不同况銜返照一山紅陰陽氣合凌空戰草木腥餘落日烘霞絢
身文成錦繡石堆鱗甲動玲瓏景雲吟出天邊月夜半巖前虎嘯風

鳳頂朝霞

猶是朝陽岡上明胡爲五彩鳳無聲餘霞繚繞蟠孤頂何日驚人聽一鳴

龍潭松韻

春潭草長綠生波水面無風鏡未磨携瑟試來松下坐老龍似解鼓靈和

菘米雙流

山名菘米畫圖看左右漁人把釣竿自在中流爲砥柱江河日下挽狂瀾

青巖積雪

雪滿危巖萬仞中空明一片色玲瓏寒威不爲青陽減絕頂猶鑿白戰雄薄暮
烟凝前界紫迎春花發別山紅摩天峭壁極高處爪迹留泥踏去鴻

紫嶺行人

蜿蜒山路最崎嶇安步當車亦坦途天外斜陽紅上嶺一肩行李杖藜扶

輝發山市

輝發今猶部落全壯觀最足雨餘天水邊瀲灩山千仞雲裡喧罵市一塵綠訝
蓬瀛三島樹青搖闐闐萬家烟秀靈脈足鍾長白扈爾奇峯萬古傳

將臺夜月

不是山行入定軍兵驚草木陣排雲登臺誰點干城將鶴唳風聲月裡聞

輝發江濱卽事

李猶龍

遠木淡斜陽西風生古渡寄語舟中人莫忘來時路

責夢

一從仗策出邊荒無復情懷返故鄉歸夢不知人去恨夜來猶自回昌陽

豆溪卽事

潮聲雜雨聲一夜西風急渡口採蓮船捲入蘆葦裡

無題

輕紅淡白燦仙葩十二闌干面面遮祇恨身輕不如燕無緣飛上海棠花天桃無主爲誰新開到此花正晚春寄語園丁好護惜移根莫使傍荆榛

讀書樂

柴扉獨掩靜無譁
竹影清搖漾碧紗
紫燕雙棲春寂寂
曉風吹送隔簾花
夜深獨步菊籬東
縹緲螢光度碧空
倚遍闌干題未得
滿身香惹桂花風

舟中問答

柳影參差拂畫橋
輕帆細雨送歸橈
離亭一曲誰橫笛
聽到陽關魂已銷

秋日即事

玉宇生寒暑氣收
疏烟淡抹夕陽秋
花殘楓葉紅飄岸
雪捲蘆花白滿州
籬菊霜黏新月冷
清溪光浸碧雲流
西風瑟瑟晚來急
更喜蟲聲與耳謀

焚香薦士賦

以薦則焚香捧表再拜爲韻

白儒珍


字聘卿

興京縣人白縣長之父也

汲引人才登崇俊彥行則以忠居之無倦乃鞠躬兮望闕誓報君恩爰稽首以

朝天欽承帝眷憶鑒衡之不爽是真卓識堪欽念推轂之無私實乃賢名獨擅
同聲同氣天下士自相應相求一德一心古之人有特知特薦昔謝宗源官居
諫議雅好多材以彰有德論道經邦求賢助國惟恐拘於私見志懍競競但求
矢此公忠心常翼翼縱教盟諸天地不負君民即令質諸鬼神有裨社稷拔茅
協吉儼然觀國之光勒鼎垂銘允矣維民之則彼蓋念祁奚而景仰懷鮑叔而
情殷鄙哉竊位臧孫何如其知允矣同升公叔可以爲文恭修薦牘謹備香熏
爾室虔心恍襲芝蘭之臭幽齋拱立如攜丹桂之芬市來駿骨之良羣空一顧
藁以龍涎之美禮肅三薰七寶騰煙麝火移時不散五更待漏蘭膏繼晷而焚
則見其七日戒三日齋香焚辟惡千人英百人俊士薦循良並非過爲謹恪不
敢漫爲揄揚嚴絕苞苴之術謹陳拔擢之方念其才德兼優支撐宇宙羨其經

輝南縣輝發城古蹟振興會五十年月日



輝發城

綸素裕變理陰陽維是香鼎香花列中庭而供奉旋看香煙香氣環滿座而芬
芳何須並設棗盛維豐且潔不必兼陳酒醴有饒其香維彼士也欽說命而道
積厥躬佩皋謨而德成邁種言稱藹藹洵可爲邦家光髦詡綦綦允宜爲師保
奉虔祈默禱以期賢路永開明目達聰彌切上聞不壅今宵拜手惟欣藻鑒之
清明日颺言不負鈞衡之重爰乃炙香檀於金鼎一團碧篆常凝猶如司香案
於玉皇一朵紅雲高捧是以禮意殷勤香煙繚繞寶鴨生輝金猊徹曉王朝之
輔弼堪稱帝世之贊襄克紹爲蒼生託福命志愈篤而愈恭爲赤子樹仁慈心
益誠而益小祝斯人之果出斯民康又可期願天子之登庸天下太平可兆虔
誠致祝德惟貴而賢惟尊慷慨陳書言可坊而行可表况乎民望攸關帝心簡
在品重當時名高百代因將履歷升聞定教弓旌下逮薦其特達圭璋薦其調

和鼎鼎薦其耕莘爲侶聘幣可徵薦其釣渭爲儔後車可載薦其循行四國預
知郇黍流膏薦其布政一方可卜召棠遺愛竭情盡慎自有初而克有終補過
盡忠豈知進而不知退雲龍風虎同欣遇合有期鳳翥鸞翔莫歎遭逢難再於
以焚香私室貽萬古之美名薦士公庭留千秋之佳話視夫告天之意乾惕交
加原其報國之心靖恭匪懈聖天子懷茲軼事勵志精勤衆百官慕此芳型和
衷敬戒寅階策士襲御香而象著離明午陛頒書宣佳土而交孚泰卦三台獻
瑞咸欽黼黻皇猷百爾銘恩共仰清平世界遠小人而親君子主德英明除朋
黨而進善良臣心耿介五雲耀彩左圖右史而書祥一炷清芬庶尹百僚而稱
快棫樸作人之化感而遂通菁莪造士之風遠無弗屆四方俊傑咸參贊化於
龍飛一介儒生敢對揚休以虎拜

楹聯

縣署大堂楹聯

考海國以披圖周肅慎漢挹婁唐韎鞮明扈倫三千年此界彼疆迨我朝一視
同仁全消畛域

攬山川而設治左蛟河右駝峰背牛星面龍窟數百里沙環水聚冀他日鍾靈
毓秀振起人文

縣署大堂楹聯

白純義

昔誰聚族來茲考古多疑縱曰挹婁曰韎鞮曰扈倫第是榛莽未除都屬夷酋
游牧地

今我服官到此虛心求治願胥訓誥胥保惠胥教育敢當花封甫蒞頓忘家相

課功箴

宜門聯

白純義

棠舍乃觀瞻所係莫云舊貫須仍但得制用便公何妨棟宇增光象符大壯
荒陲以教養爲先况復新民有誥期開誠相見務獲絃歌奏績慶叶同人

大門聯

白純義

藉名區而增韻事攬勝築堤愧乏香山雅度
飭吏治以紓民難安良除暴願追渤海高風

公園各亭聯

王瑞之

能先憂能後樂則吾豈敢

一勺水一拳山與爾斯同

有水有山豈惟金谷華林堪稱勝境
可名可誌直媿醉翁喜雨略假優游
有客皆知心似水

于龍辰

此翁真含醉名亭

李猶龍

池邊芳草青三徑

檻外遙山碧四圍

于貴中

半畝芳塘蕩槳纔知添夜雨

千條弱柳臨風恰欲挽遊人

王毓琛

纔幾時古木荒涼到此頓成新世界

試轉過綠楊深處其中別有小洞天

江顯泰

聖廟各聯

白純義

聖殿

建極咸慕時宜悟當日格物闕文預留此未洩菁華待近世技逞工能構成新
奇萬狀

立教自言無類看今番大同徵治更賴茲如神感被卜他年道周歐亞得見中
外一家

參天地以論功綜觀帝制王謨共守範圍遵大法

普埏垓而佈化須令歐風美雨早消畛域慶同庥

大道戒索隱矜奇舉吾民食食衣衣日用遵行罔踰尼山學術聖衷重博施普
濟願斯世親親長長經綸發越共承洙泗心傳

崇聖祠

至德積久彌昌溯闕里家聲光昭聖緒
殊祥應時必顯崇素王功業瑞表前麻

兩廡

爲聖學作干城帝誥王謨賴宏文羽翼
向洪流支砥柱人心世道憑大力維持
起墜緒屏異端道德攸歸功參位育
闡微言承聖統心傳所寄學貫天人

建議

輝境地處極邊爲匪患最重之區無可言諱匪患不清邊論庶政雖經軍警連

年痛勦兼以收撫不惟未能肅清而反孕育蕃殖有增無減年復一年大有野火燒不盡春風吹又生之勢所以歷任以來莫不以勦匪爲急務茲將白公於民國十五年一月上省長條陳中對於治匪之政見錄後

上省長條陳

呈爲降隊拔防在即正宜厲行清鄉謹擬訂標本兼施辦法以期正本清源而除根株餘孽報乞

鑒核採擇事竊查奉省匪患莫甚于東邊捐搶燒殺民不堪命何以屢經軍警痛勦兼以收撫不惟未能肅清而反孕育蕃殖有增無減年復一年大有野火燒不盡春風吹又生之勢知事於十三年秋接家伊始東邊最著名之悍匪奎首五龍等已被丁團收撫僅有械彈不足人數之充屢受挫創不往意均一股

於那爾轟一帶潛伏待機思逞知事一面勵行清鄉以清盜源一面調集警甲游擊山林各隊聯合痛勦不數日間而該匪嘯聚成千械彈亦復充足遂屢犯輝境終未得逞卒至逾途而陷朝陽鎮其械彈來源與嘯聚迅速誠有不可思議者當時奉直戰起地方空虛知事籌辦鄉團商團以衛閭閻又復改編警甲游擊隊以備勦擊一面調集警甲護守城池一面遣派隊伍防堵要隘籌欸以備犒賞購械以充軍寔幸年來警甲屢次與匪交綏均獲勝利惟未能蕩平殲滅寔屬內疚於心迨至去秋江浙事起陸軍拔防匪勢猖獗又復思逞知事復組鄉團騰出警甲改編游擊隊預備痛勦忽接收撫之耗以爲可以逐漸安謐詎匪徒下山擾害尤甚知事密令警甲遇有不法即行痛勦獲即法辦始稍振作日就安全似此年來無日不與彼匪徒相周旋患難餘生倍嘗艱苦匪患不

清庶政莫不受其影響現在東邊巨匪荏苒意均常山紅字以及其他小帮如要的好雙龍天順大中字野貓子等既已相率投誠則平素通濟窩匪之根株前或調查未週間有遺漏今者全形畢露毫髮無遺茲聞該降隊奉令調駐通化撫松兩縣不日即可開拔惟此股匪投誠拔防之時期正我地方正本清源之機會倘再坐失時機稍縱即逝不但餘孽蔓延終無肅清之一日即迨至夏防青紗幃起勢必嘯聚成帮又恢復從前之禍患勢非洞悉其致病之禍源絕難望其方劑之有效茲先就連年勦撫永無肅清之惡因爲我憲台約略陳之

一 軍警之通匪也 查軍人乃爲國防之捍衛最高尙之人格宜如何陶冶訓練使之潔身自好以圖報國而衛地方乃年來戎馬億倥軍人驕橫日甚官長不知管束士兵愈肆招擾甚至濟匪槍械售匪子彈勾通一氣狼狽爲

奸縱上峯命令如何森嚴限期肅清其如虛應故事何且長在自好尙知痛改前非以求自新而一般素乏教養之惰民薪餉不足以自給難免不再流爲匪至地方警甲尤屬良莠不齊游勇革兵在所難免以致今日當兵明日爲匪既不能容于匪又復投而爲兵一旦兵匪闖遇率皆故舊知交但聞槍聲隆隆孰知彈雲飛空雙方逾途繞避匪其名曰碰瑪甚至匪遺殘缺槍馬軍警獲送報功藉以多銷子彈旋復轉售于匪以圖重酬縱清鄉功令若何森嚴詎知通濟窩匪之源不在鄉村而在軍警是不僅清鄉難收效果且恐愈勦而匪愈衆愈撫而匪愈多矣

二 清鄉之塞責也 查清鄉辦法規定非不週密清查戶口既有連坐切結尤須輪流值日嚴禁軍火既註冊烙印又得互保聯結旅行遷移牲畜均發

証券烟賭嗎啡游民莫不嚴拿取締槍爐歸併屯堡嚴查往來聯防曾哨治匪之道已可謂標本兼施惟須各縣一律實行方可收事半功倍之効乃此暴彼寒各自爲政互相觀望塞責敷衍此則曰彼不實施我徒勞苦彼則曰我境肅清亦屬固然縱有實力奉行之一方終難免隣封匪徒之竄擾是清鄉之立法雖良亦猶如紙上談兵也

三 聯防之無效也 查歷年聯防之規定不啻三令五申果能實行不難收指臂之效惟各知事政權限于一隅祇期境內之苟安警甲之力自衛常慮不足何暇救援隣縣無論聯防之令如何森嚴亦須自力有餘方克兼顧連年以來各總指揮之措置掣肘怨謗交集即其實例即如職縣去歲救援朝陽鎮一役亦因前方軍事緊急全局安危所係倘任荏匪擁衆西竄後路無

援勢必影響東省大局故不措傾全縣之兵各方設卡兜擊以與該匪拚死戰幸而一戰獲捷賊勢大挫大局無恙輝南保全事後思之不寒而慄然此等背城借一之舉殆恐他縣未必所願爲也是本省之聯防既如此其難遑論隣省吉邊之各縣其實力不如奉省之充其匪患又較奉省爲重又何聯防之可言此所以聯防會哨久熟耳聞終鮮實效也

四 械彈之來源也 查匪徒之前身多爲游勇革兵莠民逃犯而以魯省客民爲尤多其始也持木棒以換洋砲（或鐵公鷄槍）其繼也即由洋砲槍奪快槍一有快槍到手即可正式入幫爲匪此爲入匪之階級至大幫股匪械彈來源不外軍警甲日商木帮糧戶其在木帮糧戶或以捐槍之逼勒或以綁票爲贖資而日商與軍警甲其絕爲貪利之買賣行爲無疑其來源既有

如是之多自非嚴禁軍火不足以制其死命也

五 匪徒之來源也 查吉邊濛樺盤各縣龍崗一帶歷年鶯粟遍山匪徒視爲奇貨可居盤距保護每年春間絡繹不絕于途者乃前往種烟之魯民也夏間絡繹不絕于途者乃割烟之魯民也秋間又絡繹不絕於途者乃搶烟之魯民也及至收穫所得終被搶徒搶劫則栽種收割之人無業可作無利可謀一載之精力付之流水勢必挺而走險俱變而爲匪以致愈聚愈衆有增無減知事蒞任後獲訊盜犯其供係因烟種割烟而爲匪者十居八九即其明証此吉邊之烟禁不絕匪徒絕無肅清之望也

六 濛江之爲患也 查東邊一帶雖云鬍匪充斥但詳審來源凡大股匪徒動輒嘯聚成千莫不以吉邊山深林密之處爲巢穴絕非隣省各縣聯防所

可勦除尤非調集重兵嚴守要隘所可防制我東邊各縣受隣省匪患者臨通輝柳首當其衝桓撫興海亦間受其害考其盜源皆潛伏于濛江山林之間南至小金川北至那爾轟儼然爲匪之領土此次在匪投誠其居住濛樺之魯省客民尙聯合擬送在匪之旂傘匪徒之根蒂如此深固已可概見加以盤踞既久山路熟習森林間障碍尤多軍警進勦則退藏於山林深密之中一經撤防則復乘隙出而綁掠巢穴不清縱將現在之匪一律收撫迨至青紗幪起難免他匪不相聚而來盤據集合又復釀隣省之巨患此乃地勢使然吉林省猶無勦除之力遑論濛江縣警團惟有虛與委蛇祇求其不在境內搶掠而已是彼自衛之力尙慮不足又何聯防之可能我奉東邊各縣雖較濛江稍爲殷富終難以一縣之力代庖勦平不得已遂擇邊境要隘設

卡防堵但此巢穴不除終必爲他匪利用其地利况政權操之于隣省而受害則厥爲東邊縱龔黃復生亦當束手

總以上匪徒來源械彈來源以及軍警通匪清鄉塞責聯防無効加以濛江之爲患有此種之原因所以連年勦撫永無寧日茲謹就管見所及擬訂治本之辦法有七再爲我

憲台縷晰陳之

一 淘汰警甲官吏也 查軍人通匪格於職權不能直接懲辦而駐在地方官吏如查有實據亦可搜証揭呈帥座以遏匪源至地方警甲應由各縣知事從嚴淘汰凡涉及通匪嫌疑以及勦匪不力庸劣各員一律裁汰並先由警甲內部施以清鄉其証明有通匪實跡或濟匪械彈者即按軍法處以大

辟以資振作而儆效尤即從前爲匪現已投誠之官長亦應分別賢否加以裁留如有擁匪自重藉以固位考其必有庇匪釀匪之嫌無論地方匪患如何最重亦屬不能留此不肖官長以貽隱憂如此則地方警甲一新清鄉亦易實行當地匪徒自無孕育之餘地矣

二 委任勦防專員也 查清鄉行政辦法既如上述之週密但非各縣一律實施難收效果擬請專委一文治武備兼全之大員總攬東邊勦防事務兼攝清鄉專責並從嚴責成各縣知事訂定清鄉考成如再有陽奉陰違視爲具文敷衍塞責之縣知事即行分別撤懲以儆將來再將各縣抽調百名聯防隊責其統帶專事防勦以一事權因應咸宜督飭各縣清鄉之進行自能次第實施斟酌各縣情勢之緩急聯防亦可不有效惟匪徒無存在之餘地

即使餘孽未盡亦不難一掃而清至現在因收撫發見通窩濟匪之戶一律從嚴懲治使奸民有所忌憚善良得以相安則匪徒自無所依附也

三 聯防加入隣省也 查吉邊濛江盤石樺甸各縣雖警團之力不充而行政寔權尙在縱無出兵會勦之寔力若能於境施以嚴密之清鄉使匪徒無卯育之隙則我東邊亦不致受隣省匪患若是之重是以擬請咨商吉林省長轉飭濛江盤石樺甸三縣加入海柳輝爲六縣省區之聯防擇定適中地點開聯防會議一次縱不希望其聯合會勦以清巢穴祇求其承認寔行清鄉以省此殺彼育根株不除縱我東邊各縣清鄉辦理如何完善終難免隣封匪徒竄擾也

四 嚴禁軍火轉移也 查匪徒械彈之來源既如上所述應分晰以杜絕之

甲 日商 應請

省署或外交署與日領嚴重交涉日商販運槍彈必須我國承認方准運輸
倘濟匪徒即助長與國之內亂有碍邦交並通飭沿海口岸水陸警察從嚴
查防獲即沒收以杜外人械彈之輸入

乙 軍人 應請


軍署對於駐軍勦匪之銷彈應從嚴限制倘查有濟匪事寔尤應以軍法懲
治以資儆惕地方官如得有軍人濟匪軍火之寔據亦應據實揭呈以肅軍
紀

丙 警甲糧戶木帮 警甲勦匪之報銷子彈應由該長官負責嚴查每逢出
發應先開明械彈實數如交鋒一畢仍由該長官復查共耗若干不使稍有

浮餘彼即無從出售倘有私留子彈一經查出定即嚴辦以儆將來至於糧戶木帮無論其被匪綁票抑係勒捐如有輸匪以械彈者即以通匪嚴辦然後遵照警務處頒發之軍火條例烙印註冊禁其轉移則匪無子彈來源槍械直同木棒有縱大股匪徒亦無能如何矣

五 禁絕吉邊種烟也 吉邊山林一帶烟苗遍山栽種者有人收割者有人搶劫者又有人秋成所獲被劫必俱變而爲匪勢非斷絕吉邊之栽種鴉粟匪徒萬難肅清濛江之荒亦絕無懇熟之日應由我奉派定軍警會同吉林省軍警于烟苗初育之期入山一律剷除將割種之徒從嚴懲治俾魯民來歸者知所畏懼一律安分懇荒縱匪徒不能因事而肅清亦去掉爲匪之一大淵源也

輝南縣城北點將台古蹟攝影



台將點

六 濠江劃歸奉屬也 查濠江地理三面隣奉東邊各縣莫不受其匪患縱清鄉實行亦不能及於隣封相互聯防彼又乏同等兵力擬懇

上將軍將濠江劃歸奉屬隸于東邊道區一切行政自必按奉天之設施殖民道途較近屯墾易於成功生產逐漸發展公款亦因之充裕警甲既不能如現在之單薄則清鄉聯防亦自與東邊各縣無異地方政務進化在之與治匪有關則前爲隣封今爲轄境其治匪之道自與治本地之匪無異再不致勦匪出境即無可追襲矣然後將邊防要隘擇警甲之勁旅防守有事聯合會勦不除根株不止無事則嚴守邊境不容稍越雷池如是則縱有匪之巢穴自不難盡力蒐索以絕其根本也

七 邊防增設縣治也 查小金川至那爾轟龍崗一帶南北約三百里雖山

芻蔓延森林蒼鬱而土地實多膏腴不惟大好疆土棄置殊屬可惜且無人經理將來樹株伐盡祇剩一片荒涼如能於小金川那爾轟兩處分設縣治四民必踴躍來歸不數年間荒地盡成熟田生產自然富庶政務設施發展匪徒自難容身且與濛江地理勢成犄角關係自深清鄉聯防均可相助爲理雖不敢謂如此辦理遽見肅清然治本之方似難捨此也

至於治標之道賅括言之不外勦防二字防者不過巡邏會哨擇要設卡以暫無綁搶捐之案爲目的勦者其勦法固不一致或臨時遇勦或入山尋勦或聯防兜勦或軍警會勦若不施行以上治本辦法其結果也非此擊彼竄即兵去匪來終有勦不勝勦防不勝防之勢是僅恃勦防固難收肅清之効但縱有治本辦法仍須輔之以勦防方克有濟則治標之勦防仍不能棄捨也知事蒞輝

年餘無一月不聞匪警即無一日不思治匪之方探本求源訪察籌議僉以上陳辦法爲合宜一時之愚或可爲涓滴之助謹爲地方請命藉舒

鈞憲憂勤是否有當理合備文報乞

鑒核採擇施行謹呈

歌諺

古者採詩取於里巷貢之廊廟上自卿貳下迄牧豎詞無雅俗兼搜並採良以染翰操觚固爲藻飾昇平輔翊盛德而草澤謳歌視聽所繫亦見民風古今無二道也今輝南地利雄厚民情樸茂隴畝叩角之歌謠鄉曲流傳之諺語雖屬俚鄙不文然而小人德草惟風斯從亦見其樂業歌風之有自也試略舉之以覘其志

歌一進丁老營溝走過略棒嶺劈開石棚金就湧西至長蟲哨東至鳳鳴頂杉松崗上多煤井燄炸全磁更猛最大出產是鐵礦按石棚溝金礦今已停採長蟲哨與杉松岡相連所謂東西一道嶺也

諺二一年兩度春帶莢貴於金謂一年之中正臘兩見立春則莢糧豆類價必昂貴也

蝙蝠掉山河嘯謂蝙蝠夜飛忽墜於地輒必大水鄉老驗之屢矣

軼聞

清初范文肅公文程幼時從父渡遼築室三通河畔夜月攻讀蒼頭隱几人靜如鷺輒聞水聲抨擊軋轢甚厲開戶視之見一鼈大如牛掉尾鼓浪稽首向月作參拜狀呼僕起視僕懼而踣遂自取弓躍岸射之鼈斃脫衣入水牽至河上

用刀割項斷尾分爲三段負至入室割其首內有鉅鹿遺書裂其腹內阿衡方略抉其尾內有太公陰符計書三通署檢古篆依稀可辨展而讀之多不識惟陰符一目了然於其用兵神出鬼沒千變萬化以少勝多出奇制勝各策讀之覺一字一珠獨有心得徹夜揣摩未遑或息荒山日出三册杳然惟巨鼈龐然夔落一殼而已其後范公從龍入關指揮如意百戰百勝人皆以爲自陰符得來故至今河名三通云

清光緒初獵者宿某行弋圍荒至蛟河遇颶風飛塵蔽目不辨物色倚樹兀坐約炊頃蕭蕭刁刁猶未之息躁極舉器仰射砉然一物墜於身旁聲甚厲物形如人官肢略具疑誤傷人悔懼奔歸越日鄰人卞某拾宿射物曳歸衆不識爲何物蓋人形而兩腋生翼似飛熊者宿聞往視歷叙原委衆大駭由是宿能射

飛人之名大噪此地山中人謂採葎曰放山邑人于郭二氏放山於濛江五臺山得葎甚夥旋里路經龍灣郭濛禍心擠于墜淵獨有其葎于幸爲葡萄藤牽礙得不死崖岸陡不能登又孤懸壑中手足無措念交友不慎攖此險虞經晝入夜飢灼萬狀採葡萄食之詰且見潭壁側石洞口大如甕可容人自顧無分生還不如挺而走險乃縱身一躍而及洞口偃僂以入漸覺曠坦前路有光行十餘里豁然開朗遙見草屋數楹隱隱道左就之見一古衣冠貽背叟與之語不通惟以手東向揮霍若示意者于乃東行又十里入一幽谷遍地葎苗類菱角牛尾金蟾龍爪等形玲瓏可愛於是採而納諸櫝中又前行得平原方十畝種葎成隴紅朶纍纍如茶如火莖高於樹花大盈把非世間所見乃傾櫝墜之忽一髻齡童子奔至精氣勃勃盛怒叱曰何物狂奴獵我園中葎行篋已盈猶

得隴而望蜀耶以手揚塵于目迷不能視婉辭謝咎已而童子曰速去吾不汝殺設遇吾父汝其休矣于接目不見童子遂狂奔忘來時路行約二時之久髣髴已還人世審之濛郡五臺山也計程已二舍矣山原孕秀草木鍾靈豈其然耶

獵者武甲武乙露宿龍潭見水面火星亂拋潑刺有聲赤燄燭天水中突起樓閣聳入雲端峻宇雕牆飛甍俛闥晶瑩皆似水晶潔雅絕倫男女幢幢往來如有趨供已而管絃齊作鈞天廣樂霓裳羽衣祇應天上覓異人間二人方凝視頃有物自樓降潭徧體鱗甲獨角紵昔舉銃擊之咆哮入水說者以爲龍云縣屬二區民戶范景全之妻某氏於民國十二年五月一貽生三子膺偉岐嶷不折不副王杼知事傳諭而厚賚之鄉曲細民雖無薛鳳荀龍之聲然耕鑿無

愆元精耿耿亦見民之厚也

錄之是非得失一惟記問之是資向者以桑梓之地而戡察之而編輯之於興
京縣志猶多未能自信矧此空言是取之爲志其事雖得於輝之人得必其無
撲朔迷離者然而已脫稿矣林琴南曰以一人之精力欲以應萬目之取求烏
能家酬而衆給余於是同慨焉余猶望得輝之明達之士鑒定而後付之梓
則其謬必減而余後之惴惴之情或少減矣

中華民國十六年六月 日于鳳桐識

輝南縣志刊誤表

卷數	頁數	行數	字數	誤字	正字
一	卷首頁正面	五行	二字	願	願
一	卷二頁背面	二行	二十九字	余	余
一	卷三頁正面	六行	九字	以字多	宜刪去
一	卷三頁正面	八行	二字	疆	疆
一	卷三頁背面	首行	十六字	且	具
一	卷四頁背面	二行	十七字下脫以字		
一	卷四頁背面	二行	二十七字	所字多	宜刪去
一	卷五頁背面	八行	七字	丈	大
一	卷七頁正面	六行	八字	余	余
一	卷十一頁	十行	三字	於	纂
一	卷二十三頁背面	二行	五字	地	地
一	卷二十四頁正面	五行	二十二字	問	問
一	卷二十四頁正面	七行	十字	葉	業
一	卷二十五頁正面	九行	二十五字	收	牧
一	卷二十八頁背面	四行	五字	本	木
一	卷二十八頁背面	四行	十三字	興	興
一	卷二十八頁背面	五行	物產二字應另列一行		
一	卷三十頁正面	二行	二十五字	問	問
一	卷三十一頁背面	首行	萬與即字顛倒		
一	卷三十三頁正面	七行	七字	餘	幹
一	卷三十三頁正面	十行	十字	餘	幹
一	卷三十四頁背面	三行	三字	餘	幹
一	卷三十六頁背面	五行	二十七字	各	谷
一	卷三十七頁背面	四行	下字之下脫二垂字		
一	卷四十一頁正面	首行	二十一字	蓉	臚
一	卷四十二頁正面	三行	十九字	自	作
一	卷四十二頁背面	三行	二十五字	起	超
一	卷四十二頁背面	七行	十九字	如	各
一	卷四十五頁背面	二行	四字	弊	涎
一	卷四十六頁正面	五行	十六字	海	流
二	卷首頁正面	五行	二十四字	首	音
二	卷十二頁正面	三行	七字	雪	雲
二	卷十九頁背面	四行	九字	者	各
二	卷二十六頁正面	三行	二十七字	以字多	宜刪去
二	卷二十六頁正面	七行	二十四字	軒	斬
二	卷三十二頁正面	八行	十二字	今	令
二	卷三十二頁正面	九行	三字	遂	遂
二	卷三十二頁背面	六行	二十三字	且	且
二	卷三十五頁正面	七行	第十字下脫韻字		
二	卷四十二頁背面	九行	二十一字	經	費
二	卷四十三頁正面	三行	八字	代	伐
二	卷四十七頁背面	八行	十七字	戮	戮
二	卷四十九頁正面	首行	第十四下脫黨字		
二	卷五十頁背面	二行	二十八字	目	日
二	卷五十頁正面	二行	四字	賬	帳
二	卷五十二頁背面	八行	十四字	關	聞
二	卷五十五頁背面	八行	七字	以	上

三	卷	九頁正面	七	行	二十八字	捐	損
三	卷	十頁正面	二	行	二十五字	遠	過
三	卷	十九頁背	五	行	二行	面	而
三	卷	二十二頁正	七	行	二十二字	南	男
三	卷	二十二頁正	八	行	首字	婚	婿
三	卷	二十六頁背	三	行	十四字	芽	茅
三	卷	二十六頁背	十	行	三十字下脫擊字		
三	卷	二十七頁正	首	行	十二字	加	如
四	卷	首頁正	四	行	十三字	謹	謹
四	卷	二頁正	首	行	六字	在	任
四	卷	三頁正	二	行	十七字	有	於
四	卷	三頁正	五	行	牀字下脫第字		
四	卷	六頁正	三	行	七字	青	清
四	卷	六頁正	九	行	三字	際	德
四	卷	八頁正	五	行	首字	撫	拯
四	卷	八頁正	九	行	二十字	葵	燹
四	卷	八頁背	三	行	十四字	備字多	宜刪去
四	卷	十二頁背	四	行	八字	旋	族
四	卷	十六頁背	八	行	十九字	達	達
四	卷	十六頁背	十	行	二十七字	可	何
四	卷	十七頁背	六	行	十八字	敞	敞
四	卷	十九頁正	四	行	二十四字	叛	判
四	卷	十九頁背	六	行	二十一字	帥	師
四	卷	十九頁背	十	行	十七字	緝	淫
四	卷	十九頁背	十	行	二十六字	巖	嵯
四	卷	二十頁正	二	行	九字	慨	情
四	卷	二十頁背	四	行	三字	君	居
四	卷	二十六頁正	七	行	七字	難	艱
四	卷	二十六頁背	四	行	三四字	真舍	直合
四	卷	二十八頁正	九	行	十九字	家	冢
四	卷	二十八頁正	十	行	十九二十五	之不	不之
四	卷	二十九頁正	首	行	三十字	要	要
四	卷	三十頁正	首	行	二十八字	會	會
四	卷	三十頁背	首	行	十二字	措	惜
四	卷	三十二頁正	五	行	十三字	搶	匪
四	卷	三十二頁背	二	行	首字	裁	裁
四	卷	三十二頁背	十	行	十八字	不	以
四	卷	三十三頁正	四	行	五六有縱二字	顛倒	
四	卷	三十四頁背	五	行	二十九字	之	在
四	卷	三十六頁正	首	行	四字	丁	了
四	卷	三十七頁正	四	行	十三字	且	且

輝南縣志卷四

附記目次


人物

藝文

建議

歌諺

軼聞




人物

節婦

劉氏苗萬恒之妻母家團林子村氏幼嫻內訓適苗室以淑慎聞年未及笄時萬恒病故青春子遺白水盟心謹守閨範笑言不苟至於鶴髮盈頭面堂節婦堅鄉里巾幗實矜式之

姜氏朱鴻聲之室氏二十二歲鴻聲長逝朱本巨室族大丁多鴻聲又以冢子承家氏繼夫緒矢志守節翁姑娣姒事畜維周家政中饋一由氏擘畫之老幼罔不悅服現年五十二歲三十年亮節人無閒言云

張氏適尤室年二十五歲夫萬財物化氏方中年張氏故貧茹苦守志掘羅自給野蔬充膳落葉添薪三旬九食而不易冰霜之操黨閭重之



二王氏輝發城白室婦而娣姒者兄福弟祿先後以中年溘逝二王分辛同苦互勵堅貞翁姑老以喪子之故精爽瞽亂喜怒無恒王事之斑綵承歡一如福祿生時數十年如一日遠近稱爲白室二節說者榮之

張氏馮祿內助也持家勤儉尤尙貞堅二十六歲時夫故遺子太昌方六齡零丁孤苦無父何怙氏撫孤漸長教養兼盡底於成立家道中興現年五十五歲韓氏太平溝士祥之女幼寡言笑勤工作日助母具餐飯夜則挑燈縫紉深居簡出非戚族罕覲面者二十一歲于歸邑人張彬事姑相夫惟敬惟順逾五年舉一男而彬卒氏從容營喪貌若不甚戚者然累日不食家人解之不應終不食幾憊矣姑謂之曰予年已六十矣子已亡朝夕所依惟媳與孫耳汝必殉夫者老朽填溝壑不足惜弱息失母未必成長如張氏宗祧何也氏悚然起失以

事親撫孤自在其後理家如故而終歲無笑容定省面親則怡怡如也又八年
姑歿子漸長教之讀以振家聲絕緒再昌懿範益固今年六十有三諸孫繞膝
扶老承歡天之所以報施善人固不爽歟

趙氏母家平安川適于室二十七歲時夫興齡染疴而逝氏承先業撫遺孤底
於藐孤成立衰祚中昌以全節終

鄒氏適王世有爲室二十七歲時夫故家道衰落度日維艱氏堅貞厥守勞十
指以謀衣食教養繼子以縣似續一生大節人無閒言

吳氏適輝發城楊室三十歲時夫百齡故撫育遺孤教養成立柏舟之節永矢
弗諼

白氏苗萬恒之妻三十歲夫故教養遺孤備嘗艱苦堅卓之操始終不渝

林氏王振升妻也槃匱恭謹克盡婦職三十六歲時夫故遺腹未卜男女痛不欲生繼思如生男爲夫續宗祧血食尤重於硜硜溝瀆也乃負痛獨活井臼自給既而果生男教之勤儉孝義克繼父志至於成立現年五十五歲譬於松柏歲晚不凋云

孝子

洪福壽原籍熊岳人也甲午之戰避兵燹奉母來輝遂家焉初外兵由遼東灣登陸至於熊岳憑陵所至人民蕩析福壽母某氏老且癯福壽盡棄所有負母逃匿東北摩天嶺山谷中飢不得食出覓人烟入避兵火展轉於遼東者數月孝子恒終日飢得食輒以奉母兵事漸及東方本溪興京之間馴至亦成戰場孝子身亦罷覓得小車載母而挽之折而北出柳邊度龍岡越柳河陸行千里

至於輝發乃得避秦居民義之庇廈以居裹糧相餽而驚頓之餘母益病福壽益敗平居不苟受賜必耕鑿以奉母母艱有步履出入溲溺必負戴之至於污孝子衣而不厭母歿哀毀幾殆嗚呼可以風矣

馮福業農生有至性事親尤孝怡色柔聲曲承歡意率妻子作山中鋤禾日汗滴隴間輒奔歸視其親家人茹粗糲而每以甘旨奉親父老病沈綿牀孝子衣不解帶口嘗湯藥以進者數月溲污輒手滌之不令妻子執役必躬親乃己其孝誠人所難也

外宦

薛德履字仲和直隸獲鹿人清季附生宣統元年奉天總督錫良由山西知州奏調派爲輝南廳設治委員翌年授輝南同知時當設治伊始凡百設施悉心

擘畫事必躬親日不暇給縣境東隣濛江山深林茂久爲盜藪公乃督練巡預各警勦防並施俘獲嚴懲執法不阿治輝未半載雷厲風行聲威所播羣盜遠遁境內肅清乃徠墾戶以闢田疇設學校以興絃歌而復捐廉購書頒賞學子以策進益其勤政有如此者每逢節序風日清佳輒延致田間父老衣褐白髮者集於公堂溫語勞之殷殷詢民間疾苦諄諄戒以孝悌教其子弟惟其能親民以誠導民以義故民無不奮而爲善政易舉而惠易施也二年春以勞致疾辭職去百姓攀轅遮道遠送三十餘里至輝發江上猶不能別公揮手曰去矣若各勉於爲善何恤乎離也迄今遺愛猶在人心云

徐星朗字奎五遼陽縣人民國紀元秋到任明達幹練知人善任政無不舉公以縣處邊陲盜賊時起若不爲關禦暴一旦捲土而來如入無人之境乃籌款

築城以爲屏藩又通融園法藉以振興市面於是商民安於垣堵豪強納於軌物緬懷往蹟無不歎樂業安居之有自云

鄭步蟾字萊仙江西上饒人性恬靜蒞任伊始值旱荒飢民浮動公悉心籌劃賑濟安輯卒致平定適省令地畝悉以中則納賦不蠲澆薄公以輝邑地瘠民貧如令升則細民何以堪命乃不畏觸忤詳情陳籲請予蠲免幸邀省憲俞允酌量辦理鄉曲受惠至今頌之

趙鵬第字孟南京兆大興籍民國六年春由鳳城稅捐局長權攝縣篆下車聿始整飭庶政不遺餘力每慨於縣境僻處一隅菑畬甫闢歲或不稔民食堪虞乃仿古義倉制積穀備荒迄今四鄉倉穀庾敖猶存而編氓無憂於荒歉者公之力也又以匪警時發消息不靈乃及十紳籌鉅款設置電話慘淡經營卒底